

Vun driweriwer

erscheint auf www.lenauheim.de

monatliche
Erscheinung

Februar 2011

von Helen Alba

De Militz un sei Schlachter

Jedes Banater Dorf hat doch sei Militz ghat. So war des ach bei uns in Bogarosch. De Militz war e Rumäner, er hat e deutsches Weib gheirat un des war dann eenfach es Militz Kathi.

De Vetter Pheder war Schlachter im Dorf. Un an eem kalte Wintertach hat er ach beim Militz zwaa fetti Schwein gschlacht. Weil e Militz jo seim Dienscht hat nohgehn misse, grad wann Schlachttach war, hat er an sellem Tach geger Owet in der Haapgass haptak gstann, dass jo alles sei Ordnung hat in dem Dorf. Selmols sin jo die Leit mit de Bizikle gfahr, nor hie un do hat mer e Auto dorchs Dorf fahre gsiehn. Un die Bizikle, die han e rotes Blinklicht han misse, dass mer se schun vun weitem gsieht un auswaiche kann.

Iwerdem war de Vetter Pheder fertich mit der Schlachtere, es Militz Kathi hat em noch e Glas Wein ingschenkt, sei Zecker vollgstoppt mit eem Stick Karmenadl, Brot-, Blut- un Lewerworscht – was halt so e Schlachter als Lohn for sei Arweit kriet hat. Es war schun gut duschter, wie de Schlachter sich uf sei Bizikl gsetzt hat un je geger hem geradelt is. Natierlich hat er weder rotes Licht noch e brennendi Taschnlampn am Bizikl hänge ghat.

In der Dorfmitt, grad newer em Kufeserat, steht de Militz uf der mitte Damm, hebt die Hand un macht de Vetter Pheder stehn bleiwe, froot ne for was er ke rotes Licht am Bizikl hat un bevor der Mann was saan hat kenne, war er gstroft. Er murkst awer trotzdem: „Genosse Militz, ich kumm doch vun eich derhem, wu ich gschlacht, Worscht gemacht un aa gleich alles ingsalzt han. Ihr kennt mich doch nit jetz a noch strofe!“ Doch de Militz erwidert: „Hat mei Bäsl Kathi eich for die Arweit entlohnt? Ich gsiehn, ihr hat e gstuppt volle Zecker anhänge! Also dann, nix wie hollgosch. Die Schlachtere is ens, die Gsetze, des is was anres. Morje erwart ich eich in meim Biro, dass der die Geldstrof zahle tut!“

De Vetter Pheder hat sich am Kopp gekratzt, hat sei Pelzkapp hin un her gschob. Doch hat er sich nit getraut, weiter zu reklamiere, weil er is jo selwer drufkumm, dass des roti Blinklicht am Bizikl notwendig is. Un hat sich vorghol, wenschtens e brennendi Taschnlampn anzuhänge an die Biziklstang, wann er wieder im Duschtre dorchs Dorf fahre tut.